

Euch'mystère du bo Erness

Il est huit heures, tiot Léon met sin cache-nez, print sin sac à dos aveuc ses lifs, ses cahiers pi aussi sin casse-croute pou midi pache qu'à s'n'école, n'a pon cor eud cantine et après avoir imbrassé s'mère, il print l'route pou l'école. Prinde eul' route, ché gramin dire, ses parints, y sont sinsiers et z' habittent tout au bout d'un qu'min pon goudronné. Ch'gosse, qui a huit ins, y drot partir eud bonne heure pour li attraper ch'autobus qui s'arrête ach' carrefour su l'route nationale. Ch'qu'min d'terre est bordé d'camps bin sûr. Ya un tiot fossé su l'drote, aveuc ed l'ieu d'dins. In ch'momint qui fait sec, cha va, mais quind y pleut gramin, ch'fossé y déborte et sin père il est pon containt. Il a déjà été l'dire al mairie, mais ché sous y minquente in ch'momint dins l'caisse d'eul commune pou faire des travaux. Su l'gauche, y a des bettrafes jusqu'au bord de ch'q'min. L'sinsier qu'y cultif euch canmp, il a eu peur eud perte enne roque(1) ed terre et il a labouré jusqu'à chez caillots. Ch'quemin, y fait bin quat chins mètes eud long, mais à in indrot, sul gauche, y a un tiot bo. Ch'bo Erness qu'in l'appelle. Personne a connu Erness et personne n'sait pourquo in l'appelle comme cha. D'ailleur, ché in bo si in veut. Y fait tout just treinte mètes eud larque sur une tiote quinzaine ed profondeur. N'a personne qui sait à qui qu'ché et l'motié d'chès peupliers qui sont d'dins y sont morts ou bin quéillus (2). Ché fougères et chés ronches l'ont invahi et in auraut bin du ma à l'traverser. Ché chasseurs du coin, y sont bin contints car même ché quiens y n'peuvtent pon y rintrer et cha leur fait eune belle réserfe eud gibier. Tout in

avinchant, tiot léon y busille (3). Bin qu'ché pon cor tout à fait l'saison, ses parints y z'ont promis Diminche d'aller faire in tour à la mer. Ché putôt rare qu'y s'in vont, mais in ch'momint, y sont putôt in avinche su leur ouvrache.

Arrivé au mitant de ch'bo, y vo qu'eune auto al a voulu faire d'mi-tour et comme euch quemin n'est pon larque, ches deux reules arrières al sont vnuies sul'bord d'euch fossé et al z'ont minqué d'quère ed' dins. Malgrès tout, ché reules d'eu d'vin al z'ont patinées et in vo qu'des gins, y z'ont du déquinte et pousser a ch'cul pou l'déraquer (4). Comme ché eune année sèque et qu'cha fait bin quinze jours qu'il a pon pleu, in vo pon gramin (5) d'traces su ch'quemin, a part q'ché reules eud d'vin al z'ont arraché des caillots pour arriver à r'partir. Tiot Léon, cha l'intrigue in tiot peu et y ravisse tout autour in essayant d'vere chou qui s'est passé. Alors, à environ tros mêtes dins ch'bo, il vo, parmi chez ortilles et ché fougères, queut'cosse eud rose. In ravisant bin y vo qu'ché eune baskette.

Cha l'intrigue, mais, comme l'heure al avinche et qui n'veut pon louper sin car, y s'in va in courant pour rattraper l'timps perdu. Pindaint l'classe, il arrête pon d'y r'pinser et l'maitresse, al vo bin qu'il est dins la lune, li qui d'habitute est si attintif. Quech qui s'pass Léon, t'est pas bin réveillé ch'matin? (in réalité, al y parle in frinçais, mais ché mi qui raconte qui parle patois). Non m'dame, cha va bin. J'vo bin qu'a queut'cosse qui t'raccasse. Allez raconte me. Et tiot Léon raconte ch'qu'il a vu. L'maîtresse, al fait simblant de rin, mais al print cha au sérieux. Tiot Léon ! Viens chi à m'plache, j'ai eune commisszion à faire euq j'avos oubliée, surveilles tes camarates, j'a r'viens tout d'suit. Et, si sont pas saches, té mel dira quind j'arviendrai. Aussitôt, al s'in va al mairie. Cha quait bien, ch'maire il est là. Ch'est putôt rare dins l'jour car ché in sinsier li aussi. Il est

intrain d' parler aveuc un jaune homme que ch'l'institutrice al connot pon. Ché in jaune homme putôt grind, aveuc des longs cheveux et des baskettes à ses pieds qui s'armaqu'tent (6) tout d'suite parche qu'al sont roses fluo. Al deminde à ch'maire d'y parler à li tout seu et ch'maire y dit à ch'garchon d'aller faire un tour dehors. Alors al y raconte chou que ch'gamin Léon y ya dit. Pi al artourne à s'n'école.

Ch'maire y fait rintrer ch'gamin et il y dit : Viens, in va aller faire in tour à ch'bo Erness, y parait qu'y s'a passé queut cosse là là.

Ch'jaune homme, il a acouté à l'porte chou qui s'est dit et y répond qu'il a pon quère cha et qui préfère pon y aller. Alors euch maire, y vo passer ch'facteur. Il y dit d'poser sin vélo et d'venir aveuc li.

Ch'facteur, cha l'arringe pon gramin, il a pon fini s'tournée, mais il y va quind même. Y monte dins l'camionette de ch'maire, non sins avoir éssuyé ch'sièche plein d'poussière pour li pon salir sin patalon.

Y a bien eune quinzaine eud kilomêtes pour rattraper l'route nationale et pindint ch'timps là, ch'maire il esplique chou qui sait à ch'facteur.

Arrivé su l'route nationale, in tiot bout après, in apperchot eune alleumette (in piquet blinc aveuc in bout rouche). Ché là! Qu'y dit ch'maire. Y met sin clignotant et y s'ingage dins qu'min d'terre.

Du coup, y r'pinse ach' sinsier qui s'plaint d'euch' quemin quind y pleu et y n'sait pon quind' èche qui pourra faire curer ch'fossé. Peu de tinps après, y z'arivtent' à ch'bo. Y vottent bin chés traces eud pneux, mais y ont pon leurs yux exercés comme euch gamin, alors y sont obligés d'avincher in tiot peu din ch'herpe in écartant ché branques et in évitin d'eus'faire piquer par chés ortiles. Alors là, y vottent eule baskette, mais y vottent également des traces eud pas aveuc, au mitan eune trace régulière comme si in avot triné queud'

cosse. Y s'avinch'tent donc et qu'èche qui vottent : Un corps eud jaune feume allongé su l'vente aveuc eusse robe artroussée et s'culotte abachée y vottent aussi qu'y l'y minque inne queuchure (6). Tout d'suite, euch maire y dit : Touchons à rin et allons prév'nir chés gindarmes. Y r'montent tous les deux din ch'l'auto. Ch'maire il y fait faire demi-tour. Il est obligé d'faire pusieurs manoeufes et y s'in'r'va bin vite sin pinser qu'il a effacé les tros quarts eud' ché traces qu'l'aut bagnole al avot léchée.

A six heures au soir, tiot Léon rinte à s'mason. Y raconte à sin père chou qu'il a vu au matin in s'in allant à l'école et pi qu'al sortie, il a vu ché gindarmes dins ch'villache. Sin père il y dminde s'il a raconté cha à l'école. Bin ouai qui dit. Aye aye aye qui dit ch'père, in a pon fini d'ête imbété.

Cha minque pon. Deux minutes après, in tapte al porte. Ché chés gindarmes. Bonjour monsiu, ché bin vot tiot qui a vu qu'eut cosse ch'matin? (chés gindarmes, y parlent té pon non pus patois, mais ché mi qui raconte) Ben ouais, mais y n'in sait pon d'pus et mi non pus. Ech que vous étes sortis ch'matin? Bin ouais, j'ai été pulvériser min camp d'blé qui s'treufe din l'commune voisine. Il étôt queule heure? Chinq heures et d'mi- six heures, avint qu'eul rosée al seuche partie. Vous avez pris ch'quemin là? Forchémin, y n'a pon d'aute. Et vous n'avez rin vu? Bin non, vous savez quind in conduit in tracteur aveuc eune charge eud'deux tonnes ach'cul, in fait surtout attintion à aller drot. Vous avez pon crogé ine auto? Non. . . ah!, ach't'heure euq'vous l'digez, quind j'sus arrivé su l'route nationale, j'ai été étonné, eune auto al s'est arrêtée pou m'laicher passer. Ché bin l'preumière fo qu'cha m'arrive, des fos, j'su obligé d'atteinte in bon momint qui n'euche pu personne. Que genre d'auto ? J'ai pon fait attintion, al étot noirte ou bin bleu foncé, mais j'ai pon ravisé l'plaque d'immatriculation. Al venot du côté d' l'autoroute. J'ai

quind même vu qu'y z'êtotent à plusieurs eud d'in et j'leur ai fait seine merci. Vous n'savez rin d'eut ? Bin non. Que voulez-vous que j'vous diche? Bon, merci de vos rinseig' mints. P't'ête qu'in r'vendra vous r'vire. Si queut cosse vous r'passe dins vot tiète, n'oubliez pon eud v'nir nous l'dire.

Ché gindarmes bin sûr, y trinmettent à leur hirarchie, qui transmet au parquet, qui avertit ch'commisariat l'pu proche, qui li même invoye in inspecteur eud police judiciaire aveuc eune équipe scientifique.

Ch'inspecteur, un bonhomme assez viu déjà, proche eud'l'artraite à vire es n'allure, il arrife su l'indrot du cadafe aveuc eus n'équipe ed savaints. Cheux là s'mettent eune tenue blinque et aussitôt s'mettent au traval. Li, il acoute in tiot peu ch'qui disetent chès gindarmes, pi y print s'n'auto et file à ch'villache.

Contrarmin à ch'in pourrot pinser, y va pon directemint à l'mairie, mais à ch'bistrot d'l'aut côté d'el plache. Comme in y a dit qu'euch facteur il avot participé al découverte, y s'doute bin qu'tout ch'vilache y est au courint. D'ailleurs y a déjà des autos qu'arriftent et in vot bin qu'ché des journalistes. In intrant, y s'fait pon connouainte tout d'suite. Y veut d'avinche acouter chou qui s'dit. Y là tros quate bonhommes qui, bin sûr, discutent ed l'affaire. Ché surmint eune prostituée qu'a la pon bin fait sin boulot, qui n'a un qui dit.

Ch'inspecteur, y comminde in café et in cognac. Du coup, ché types y s'artountent et vayant qu'ché in étringer, n'a pu un qui dit in môt. L'patron y vient l'servir et ch'inspecteur, il y moute eus carte eud police et li d'minde ch'qu'il a intindu dire. Pindin ch'tinps là chés camions d'télévision y arrivtent. Y n'a tellemint qu'y saventent pus du s'garrer. Ch'patron li dit qu'd'après ch'quil a intindu dire, qu'in cadafe eud feume à été trouvé pon lon d'ichi dins in bo. Vous n'avez

pon vu d' trainard par ché temps qui ceurrent? Ni rien qui vous aurot simblé bizarre? Non qui dit ch' patron. Vous savez, ichi, ché in patelin calme. A part quec' fo des jaunes qui ont in tiot peu trop bu et qui font in tiot peu d' grabuge, y s' passe jamais rin. Au fait, qui dit ch' inspecteur, j' vâ surmin n' navoir pou quéqu' jours, vous connaîchez queut' cosse din l' coin pour mi minger pis dormir?

Y a bin in Hôtel restaurant à aine vingtaine eud kilomètes d' ichi, mais mi, j' peux vous proposer eune champe et j' fais aussi à minger. Bin sûr, ché l' plat du jour, y a pon à cusir. Cha srot quatre vingt euro par jour. Cha m' va tout à fait. Vous m' frez eune note eud frais quind j' partirai. Pou ch' prix là, min patron y sra containt. J' m' in va r' vire su l' terrain chou qui s' passe et vers midi euch s' rai là. D'accord qui dit ch' patron, in minche à midi et d' mi. Faut éte à l' heure pache que l' tiote qu' al vient servir al est là qu' a mi-temps et j' ai pon l' moyen d' y payer des heures sup.

La d' sus, ch' l' inspeteur, y print s' n' auto et y s' in r' va à ch' bo Erness vire à co qu' y z' in sont. In route, y pinse qu' ché surmint ch' l' auto qui a am' né ch' cadafe que ch' sinsier il a vu et qui l' a laiché passer. Y voulottent rintrer din ch' qu' min d' terre. Pour v' nir là, fallot qu' y connoch' tent euch' coin. Y sont surmint d' pont d' très lon d' ichi. Il arrife su l' plache, n' a déjà des autos d' gareés tout l' long d' eul' route nationale et y peut pon trouver eune plache. Y téléphone à chés gindarmes eud venir dégager tout cha, qu' y voudrot bin pouvoir arriver sur les lieux. Ché gindarmes, y dégagtent comme y peuvtent eul' route. Cha tombe ben, vla justemin chés imbulinciers qui arrivtent.

Sur plache, ché types in blinc, y zont à peu près fini. In gros, y z' y digent que ch' cadafe, il devot déjà éte mort quind in l' a amné ichi, qu' a preumièe vue, il a pont eu d' cop, ch' méd' cin légiste y n' in verra

surmin d'plus, mais qui n'ont pon gramin d'traces, chés herpes al sont trop drues. Sauf in morciau d'tissus qu'a resté accroché à eune ronche et qui z'ont mis dins in sa d'plastique. Y z'ont quind'même arlévé des imprimtes eud pneux, mais al z'êtotes déjà bin effacées par eud d'z'eutes pneux et in n'poura sûrmint pon in tirer grind cosse.

Ché malheureux qu'cheux qui ont amné ch'cadafé, y zont pon r'culé in tiot peu d'pus, y n'aurottent pon pu r'partir. In a applé chés imbulinciers pou qu'y z'immètent euch' corps à l'institut légal afin qu'y fache l'autopsie. Ch'inspecteur, y ravisse euch cadafé et y s'dit qu'si s'rob ai étôt r'tournée et s'maronne abachée, ché sur'min qu'cheux qui l'on amné là, y z'ont voulu faire croire qu'chétot un crime crapuleux.

Chés imbulinciers, y postent leur chivière comme y peuvtent dins ché herpes et, aveuc gramin d'précautions, y postent euch'cadafé ed su in laichant l'moins d'leus traces possipes.

Avint d's'in aller minger, ch'l'inspecteur y téléphonne à sin commissaire pour lui dire chu qu'y sait jusqu'à ach'teure. Ch'commisaire il y dit qu'y voudrot bin qu'cha seuche vite réglé. Ché nouvelles y vont vite et il a déjà eu in appel d'euch' préfet.

Comme il est pon incore tout à fait midi, ch'inspecteur y passe pa l'mairie qui est cor ouverte. Y rinte dins l'graine salle et y vot ch'maire intouré d'eune digaine eud gens aveuc des apparels photo qui sont in train d'l'intéroger, et ch'maire y sait pon commin s'in dépatouiller. Li, y moute s'carte eud police et y dit à tout l'monte eud dégager. Ché gens y s'artournent sur li et y comminchent al l'interroger a sin tour, mais li y s'lèche pon faire. Allez ouste qui leur dit et y finissent par s'in aller. Ya juste que ch'maire qui reste avec euche jaune homme. Ch'inspecteur y dmainde : Qui ché ch'ti là?

Ché in stagiaire, Il est du villache? Non, ché in jaune qu'a fait des conneries et qui drot faire quatre vingt dixge heures eud traval d'intérêt général. Quo qu'il a fait comme connerie? Cha, j'n'in sait rin, y n'm'eul'la pont dit, chès gindarmes y m'on dit seulemint qu'y fallot just s'méfier pou chés sous et d'bin freumer l'tiroir caisse quint'in s'in allot. J'eur ai même dit in rigolant qu'y n'avot pon graind cosse dins l'tiroir d' eul mairie Et quo qui fait au soir après s'journée ? J'nin sais rin, il a des copains qui viennentent eul ceur eud temps in temps in auto, mais je n'sais pon du qui vont. Y rinte des fos au matin, mais il est toudis à l'heure pour travailler. Quèque fos y dort a motié su s'n'ouvrache, mais ché in jaune, faut l'excuser ! Hier, il a rintré à queul' heure ? J'n'in sais rin, mais ch'matin, il étot à l'heure comme d'habitude.

Vous voulez bin m'laicher tout seu in tiot peu aveuc li? Bin sûr qu'y dit ch'maire et y s'in va dins l'pièche à coté.

Alors, jaune homme !, quo qu'ta fait pour ti avoir récolté eine peine comme cha? Ch'garchon, y répond pon. Té peu me l'dire, si bin, j'ai qu'a téléphoner au commissariat et y vont m'eul' dire. J'ai volé à minger ach' super marché. Pourqo? t'avos faim? J'avos pon mingé d'pis deux jours. Quo qu'te fait dins la vie? Rin. Duc' ché qu'té loge? Ch'su sdf. In ch'momint, ch'maire y m'a trouvé in cagibi à côté d' eul mairie et ché là que ch'dor. Parles me in tiot peu d'tes copains. Là, ch'garchon, ys'freume comme eune huitre, y dit pu rin. Té veux pon rin dire? L'aute y répond pon. Si ché cha, min garchon, j'va appler ché gindarmes et y vont t'im'ner au commissariat. Bin j'ai rin fait qui dit ch'garchon. Ché chou qu'in verra. Et peu de temps après, l'fourgonette al arrife pou l'em'ner. Ch'inspecteur y pinse qu'in tiot peu d'garde à vue, cha l'fra réfléchir.

Pi y s'in va vite ach' bistrot pour minger. Il est pon in avinche (7). Il arrife, mais y vot seulmin deux types qui bottent l'apéro à ch'bar. Y comminche a s'deminder quo, mais il intind du potin dins l'pièche à côté. Il avinche et y voye eune greinne salle aveuc eune greinne tafe du qui sont assis eune dijaine d'ouvriers aveuc leu gilets oranges. Y n'a même qui zon laiché leur casque sur leur tiète. In l'avant arriver, l'tiote serveuse, eune belle tiote blonde, al vient à li et li dit qu'a ya réservé eune tiote tafe pour li tout seul. A peine assis, al y apporte à minger. Ché ordinaire, mais appétissint, y minche eud'bon cœur. A ya mis, comme à tout l'monte, eune caraffe d'ieu. Il y d'minte si peut pon avoir in tiot peu d'ven aveuc. A r'vent avec un tiot pichet d'rouche in y dijeant qu'chés ouvriers qui travaittent à ch'rond-point qu'in est in train d'construire, y z'ont pon l'drot d'boire eud' l'alcool. Pi, al y dit : Quind vous arez fini, j'veus moutrai (8) vot chamb. Vous pourrez y monter vos affaires.

Après minger, y va s'assire dins ch'bistrot et y d'minde in café et in cognac. Ch'patron veut li offrir, mais y dit : Non non, cha ché mi qu'y paye, in peu jamais m'offrir queut'cosse pindint l'service. L'après midi, y s'in r'tourne au commissariat pour vire chou qui d'vent ch'gamin. In passant, il arrête incore eune fos à ch'qu'min d'terre, y ravisse ben tout partout des fos qui n'aurot queud'cosse euc' chés autes y z'aurottent pon vu, mais à part ch'herpe écrasée qu'al comminche à s'ardrécher, y vo rin d'espécial.

Ch'gamin il est assis dins l'cage, y tiens s'tiète dins ses mains, mais il a toudis rin dit. Alors euch'l'inspecteur y print pitié d'li, y rinte à sin tour, y s'assit à sin coté et il y parle duchemin. Eud d'u qu'ché qui sont tés parint? Long d'ichi, m'mère a l'est morte et min père y s'a r'marié aveuc un chameau qui m'a fait tout vire. Ché pour cha qu'euch su parti. Commin qu'vous avez fait aveuc tes copains pour imbarquer l'jaune file? Alors là, ch'gamin y s'arlièfe et y crie : J'ai rin

à vire la d'dins, ni mes camarates non pus. Pis y s'met à braire (9). Ch' l'inspecteur y vot ben que ch'gamin il est sincère. Alors il y dit : Bon, j'te cro, si té fais des affaires louches, té peux me l'dire j'n'in tiendrai pon compte. Mais mi, y faut que ch'seuche sûr équ'ta rin à vire dins l'affaire. Alors euch gamin, il y dit qu'il a in copain qui sait du s'procurer du cannabis et que d'timps z'in temps, y feumtent in pétard. Mais à part cha, y n'font jamais rin d'mal. Ché bon, j'te cro, il appelle euch gindarme et il y dit d'eul défreumer. T'a qu'a m'attinte là, j'va vire euch commissaire et j'ter'prindrai in r'passant. J'dirai même à ch'maire euc t'es in bon garchon et qui peut t'faire confince. Ch'commissaire il y dit : Alors? Bin alors, in n'appint in tiot peu tous les jours, mais in n'sait pon cor graind cosse.

Faudrot bin découvrir ch'ti ou cheux qu'ont fait cha. Ché journalistes, y n'arrêtent pon de m'poser des questions et mi, j'sais pon quo réponde. Ch'inspecteur il y dit qu'y fait l'impossipe, mais qu'ché pon aussi simpe euque cha. Pi, il appelle euch tiot et les vla r'partis.

Il est déjà tard, quint y rinte au bistrot et, in attindint l'heure ed'minger, y bot in tiot pastis, (toudis su sin compte). Après minger, y ravisse in tiot peu l'télé in buvant in tiot cognac, (toudis su sin compte) D'in chés chaines d'info, in n'parle que d'l'affaire. Cha comminche à l'tracasser car, pour l'instant, y n'in vot pas gramin l'bout. Y monte eus'couquer, mais dins l'nuit, y s'reveile souvint. Y n'a déjà élucidé des affaires dins s'veie, mais chelle là, y sait pon par queul bout l'printe. Pi y pinse qu'il a pon bin ravisé ché z'ouvriers. Y s'pourro qu'l'un d'euche, y euche fait l'coup et des camarates, y l'euche t'aidé à s'débarrasser de ch'corps. Faudra qu'y ravisse cha d'pu prés.

Au matin, y déquin déjonner, l'tiote al a préparé in bol, du pain du café, du lait et tout ch'qu'y faut pour li minger. Al ya même mis ch'journal su s' tafe. In première page, qu'èche qui vot, s'photo in grind aveuc, in grind, marqué : ch'nouviau Maigret cache, mais n'a cor rien trouvé. Ché journalistes, y commincent t'a l'énerver. Vla qui s'foutent eud li ach't'heur. Pi ya eune eute photo, ché chelle d'eur file. Al est pon bin nette, forchémin, al a eu longtint s'figure dinch'l'herpe. Et ch' Préfet, su l'journal, y d'minde que, si n'a quequ'un qui l'arconot, ou bin qu'il l'a déjà vue, qu'y s'adrèche al gendarmerie. Pi, y rchu un cop d'téléphone de ch'l'institut légal. Eul file, al est morte eud' pis au moins tro jours d'overdose. A part cha, rin d'espécial, al drot avoir dins les vingt, vingt deux ains et al est incore vierche. Al a pon eu d'cop sur elle ni rin du tout. Y s' dit qu'si al s'avot drogué aveuc eul bainne de ch'gamin d'eur mairie, n'a bin des gens qui l'arconnottent (10). Ché surmint pon par là qu'y faut cacher. A ch'momint là, n'a in viux qui rinte dins ch'bistrot. Y d'mainde à parler à ch'inspecteur. Ch'patron, il y moute eul tafe dins ch'coin du qu'il est. Bonjour m'sieu, je n'su pon sûr, mais j'ai peut-être queut'cosse qui pourrot vous intéresser. Ch'inspecteur, il y dit d'venir din l'pièche à coté pache qu'il vot qu'des gens, y z'acoutent ch'qui va s'dire. Il y dit d'assire et y l'acoute.

Ch'homme, il a bin eune sochaintaine d'années. Vla ch'qui li dit : Quind j'éto jaune, j'ai fricoté (11) aveuc eune file, et l'photo sul'journal, al y r'seine gramin (12). J'diro même qu'ché sin portrait tout craché. Après in a eu des bisbilles, al est partie et à s'a mariée aveuc un gros propriétaire à eune vingtaine eud kilomètres d'ichi. J'eul'l'ai bin r'grétée et j'eum' su jamais marié. Eule, al est morte acht'heur et ch'peu pont m'impêcher d'aller sus tompe ed temps in temps. Cha, ché intéressaint. Si vous pouvez m'donner l'adresse de s'n'homme, j'vas aller l'vire. Vous pouvez pas vous tromper, ché

eune graine mason, presqu'in tiot catiau, sur eun butte tout au bout d'euch villache.

Vlà ch'inspecteur parti. Il a pon cor eud GPS à s'n'auto, mais y treufe assez vite quind-même. Il arriffe devint eune grille, mais al est freumée. Su l'coté, n'a in bouton d'sonnintte, donc y sonne. Eune feume d'in certain âche al arrife et l'y d'minde quo qui veut. Il y dit qu'y veut vire ch'proprio. Al y d'minde pouquo . Il y dit qu'cha li r'avisse (13) pon. Monsiu veut vire personne et a s'prépare à s'in r'n'aller. Alors il y moute eus'carte eud police. Al est bin obligée d'ouvrir. Al y dit qu'sin patron, il est dins ch'gardin drière et qu'al va aller l'prévnir. Il y dit qu'ché pon l'ponne de l'anoncher et i s'in va dins ch'l'allée d'gravier. Y passe su l'côté d'el mason et y vo in viux, dins les sochainte diche ains, aveuc in tablier d'gardinier et in séateur dins s'main, in train d'tailler des rosiers. Bonjour qui dit ch'inspecteur. Il y moute s'carte eud'police in l'ravissant dins les yux. Ch'l'inspecteur, ché un vieu d'la vieille, y vo bin que ch'viux, il a eune tiote réaction, mais cha n'dure pon. Il y d'minte chou qu'il y veut. J'viens vous vire Pache que ch'fais eun inquette su l'mort d'eune jaune file. Vous avez combin d'infants? Deux. Ché quo? Des garchons. D'uc ché qui sont? Y travailltent. Et vous n'avez pon d'file? J'ai pu d'file. Pourquo? A quinze ains, al nous a quitté. Al est partie sins nous dire du qu'al allot et in l'l'a jamais r'veue. J'ai jamais arrivé à m'in r'mette. A r'sainot à s'mère euq j'ai perdue comme deux gouttes d'iaux. Je l'avo quère comme mes deux yux. Vous n'avez pas caché après? Ben sur euq'si, mais in l'a jamais r'trouvée. Jamais d'nouvelles? Si, eune fos, in a r'chu eune lette sins adresse nous digeant qu'al allot bin et qui fallot pas s'in faire pour eule. Ed d'u qu'al l'avot posté? D'in l'Isère euch crot, du coté d'Grenope. Ché vague, mais l'viux, y dit qu'y n'in sait pon d'pus. Vous avez vu ch'journal? Non, je n'prins pon l'journal. Vos garchons non pu?

Y m'ont rin dit. Alors, y l'y moute eul photo. Ch'viux y blainqui, y minque eud s'écouler, mais y s'eur print vite. Ché bin m'file. Alors al sro morte? Du qu'ché qu'vous l'avez r'trouvée? Din ch'bo Erness. Du qu'ché cha? D'in ch'vilache d'à coté. Ch'inspecteur, y vo bin q'euch viux, il y cache q'eut'cosse. In habitant là d'pis toudis et in ayant treuvé s'femme d'in ch'villache là, y peut pon éte sin conninte euch bo Erness. Vaiyant qu'y n'pourra pon in tirer grind'cosse d'aute, ch'l'inspecteur y s'in r'va in y digeant qu'y r'vendra surmin l'vire.

In r'partant, y r'passe devin ch'tiot qu'min d'el sinse et y décide d'aller r'vire eun fo ch' Sinsier dès fos qu'il aurot appris queut'cosse, mais il est pon là, s'feume al dit qu'il est dins ché camps et qu'y rintrera sur'mint pon d'bon'heur. In rpassant, y r'vet l'lieu du qu'in a r'trouvé l'file. Il est core intouré d'euil binde jaune aeuc, marqué police .

In arrivant a s'n'hotel, y téléphone à sin commissaire pou y espliquer ch'qu'il a appris. Ch'commissaire, y réfléchi in moment, et y décide eud téléphoner al l'police eud Grenobe pour vire si y n'ont pon intindu parler d'queut-cosse. Y z'y répontent in digeant qu'y vont ravisir si y ont des rinseignemints à l'y donner. Eul lind'main, pont d'nouvelle. Ché journalistes, y comminchent t'a s'in r'aller. Y zont surmint trouvé in och à ronger ailleurs. Ch' l'inspecteur, y vot pus gramin ch' qui peut faire ichi dins ch'villache et y va avertir ch'patron d'bistrot qu'y va s'in r'n'aller après minger et qui l'y fache eus note. Y s'ra pon payé tout'd'suite, cha s'ra l'gouvernement qui li inverra l'réglemint. Ch'patron y li dit d'accord, mais y espère qu'cha sra pon trop long, ché s'affaires, al sont pont si brillinte inch'momint. Comme il a incore in tiot peu d' temps, y va al mairie dire aur'voir à ch'maire, mais il est pon là. Forchémin, ché in sinsier et il a d'l'ouvrache. Mais ch'gamin il est là. Normalemint y devrot éte in train d'faire du balayache su chés trottoirs, mais là, il est in train

d'mette des papiers dins des invloppes et pi d'les coller. Cha va bintôt éte eus'z'élections et ch'maire il a invie d's'arprésinter.

Ch'inspecteur il y dit aur'voir in y digeant qu'il espère qu'y va bin s'ténir. Alors, euch garchon y s'arlièfe d'eus' chaisse et y vien li tinde eusse main in li digeant : J'drot vous r'mercier d'm'avoir parlé comme vous l'avez fait. Cha m'a fait réfléchir, et d'pi ch'tinp là, j'ai pon feumé in joint. Ché dur, mais ch'crot que j'vas réussir à tnir eul coup malgré qu'mes camarates y s'fouttent eud mi. Pi, j'ai d'eu chance, ch'maire y m'immongne(14) à s'mason tous les jours pour minger et y m'a dit qu'il allo preinte des saisonniers pour cueiller ses tomates et qu'y m'prindrot.

Ch'inspecteur, y l'félicite et s'dit in li-même, qu'au moins, il est pon vnu pour rin.

Mystère du bo Erness

(Bin sûr, ché écrit in frinçais, pi in graind (15), mais ché mi qui raconte) Ché journalistes y s'in donnen'tent à cœur joie, ch'commissaire y fait eune sale tiète, il est applé sin arrêt pach'préfet qu'il y dit qui va li r'tirer l'affaire. Ch'l'inspecteur, il ose pu sortir eud sin bureau. Pi, in jour, eul police eud Grenobe, al leur dit qu'al a rien trouvé. Les vlà bin avinchés. Ch'commissaire qui connot quind même bin s'n'inspecteur, y s'dit que l'miux ché qu'il l'envoye la là. Aveuc sin flair y risque eud trouver queut'cosse. Y l'i r'tient sin billet d'train et eune champe à l'hôtel, y loura eune auto la-và.

Vla donc euch'l'inspecteur parti dins l'Isère. In déquindant d'euch train, y print in taxi pou li aller à s'hotel. Y n'a jamais été dins ch'coin là et il est in tiot peu perdu. Après qu'il a monté ses affaires dins'champ, y déquin et d'minde à l'accueil du'qu'ché qu'y s'treufe euch'commissariat. L'feume al y répond qu'ch'é pon long d'ichi, il a qu'à déquinte eul rue jusqu'à ch'feu rouche et là, y tourne à gauche et ché à vingt métres sus l'drote. Y s'pésinte donc à l'entrée et esplique sin cas. Ch'flic qui l'archu, il y dit d'attinte in moment et y va l'dire à ch'commissaire qui vient aussitôt et l'emmène drière din sin bureau. Alors là, ch'inspecteur il y raconte tout ch'que nous, qu'in sait, surtout l'histoire d'euch'l'invlopp et y l'y moute el photo d'uel file. Ch'commissaire y ravisse eul photo, mais cha l'y dit rin. Drière sin fauteul, n'a in viux flic qu'y est in train d'taper sur in ordinateur. Ch'commissaire il y d'minde eud vnir vire et il y dit d'raviser l'photo. Y sait que ch'viux, il est phisionomiste et qu'equ'fo cha pourot li dire qu'eut cosse. L'viux flic, y prind l'photo din s'main et ravisse attintiv'main. Cha li dit in effet qu'eut'cosse, mais y vo pon bin. Il a bin déjà vu eune photo d' file qu'a l'y r'simpe, mais y a dejà lontimps et a l'étôt pu jaune, peut-être dins les seize ains.

Ch'inspecteur y pinse qu'cha pourrot bin être elle et y d'minde à ch'flic dins qu'eul circonstince il a pu vire ch'eul photo là.

I'viux flic y cache in momint dins s'mémoire, et y s'rappelle d'in seul cop, qu'chétot deux jaunes hommes qui sont v'nus li présinter in y d'mindant s'il ne l'avot pon vu qu'equ'part. Y leur a répondu qu'non, mais si y voulottent, y pouvot lincer in avis d'archerche. A quo, y z'ont répondu qu'non et y sont r'parti aussi vite, j'ai pon eu l'timps d'leur deminder leur nom ni leur adrèche.

Tout d'suite, ch'inspecteur, y pinse qu'ché chés deux frères qui sont v'nus cacher après leur sœur. Pis, il y vient eune idée. Y a des monastères d'in ch'coin? L'viu flic, cha li rappelle qu'ché jaunes hommes, y z'ont eu l'même idée qu'li et y leur a répondu in rigolant qu'y n'avot bin l'grinne charteuse, mais qui n'a longtainps qui n'avot pu d'moine eud dins. Ch'étot devnu in musée et qui pouvottent aller l'visiter. Cha n'les avot pon fait rire. Si ch'l'inspecteur y voulo n'in savoir eud plus à s'sujet là, y n'avo qu'a aller vire ach syndicat d'initiativ.

Ach ch'syndicat d'initiativ, in y donne tout eine liste : Là, j'va l'écrire in frinçais : St Michel de connexe Pryori, N D de Chalais, Monastère de la visitation Voiron, St Antoine Chattes.

Ch'l'inspecteur y dit: N'in ruez pu, eul cour à l'est pleine. In s'in r'n'allant à s'n'hôtel restaurant pour minger, y s'd'minde pa que bout qui va commincher. Y va pou louer ieine auto et y s'dit qu'y va commincher pa ch'pu près. Y ravisse eune carte d' eul région et y vo qu'ché N.D. de connexe. Il ira donc là après midi. Ché qu'cha grimpe dins l'région d'Grenope, il a pon l'habitue eud ché viraches et y va tout duch'min. A Priory, y s'rinceigne d'euch monastère, ché in tiot peu pu lon au bout d'eune allée. Y tape al porte, attint in bon momint, y r'tape eune deuxième fos et, à la fin n'a queu'qu'un qui

vient li ouvrir. Ché in moine qui l'y dit qu'il les dérincentent (16) in plone prière et il y d'minde chou qu'y veut. Ch'inspecteur il y moute eusse carte eu'de police et ch'moine il y dit : Incore! Et pourquo, qu'vous m'digez incore? Pache qu'in a déjà v'nu perquisitionner. Et quo qui cachottent? In homme qui drot avoir assassiné et qu'y a disparu dins l' nature.

Mi, ché pon pour cha qu'euche vient, il y moute eul'photo et y l'y d'minte si y a déjà vu l'file là. Ch'moine y répond qu'non, mais qui n'a pon longtimps qu'il est là. D'toutes façons, n'a jamais d'file qui rinte d'in ch'monastère. Ché rin qu'des hommes. L'vla pon pu avinché qu'avint. Su pusieurs jours, y va d'monastère in monastère, mais y n'obtint pon d'résultat. Tous les jours, y téléphone à sin patron pour y dire qu'y n'a rin à y dire et ch'commissaire, qui comminche à trouver l'tin long, il y d'minde si y n'ya pon d'secte installée par là. Ch'l'inspecteur, il essaille de s'rinsiegnier, in y dit bin qu'si, mais qu'ché à peu près impossipe eud savoir du qui sont et chou qu'y s'y passse. Ach'teur, y s'est habitué et y conno toutes ché tiotes routes eud'montagne, y treufe euc ché in biau pays, mais y s'rin compte qu'ché pu l'peine qu'y rest là, y trouvra rin d'pus. In rev'nint dins ch'train, y pinse, qu'sur'min, l'file, al a invoyé s'lette eud grenobe pou tromper s'famile et qu'y peuch'tent pon l'artrouver. Il l'dit à ch'commissaire quind il l'arvot. Ch'commissaire y dit qu'il a sûrmin raison, mais alors, du cacher? Eul l'in d'main, ch'l'inspecteur il artourne vire euch père d'eul file. N'a in d'ses deux garchons qu'il est là. Quind y l'voye arriver, tout comme euch père l'eut'jour, y s'troupe in tiot peu. Mais il s'arprind vite. In vo bin que ch'père, y n'y in a parlé. Vot frère est pon là? Y est parti ach'super marché, mais y va bintôt r'venir. Vous travaillez pon aujour d'hui? In travale dins l'même boite et in a pris quinze jours eud congés. D'ailleurs, l'vla qui rinte. In effet, ch'frère il arrife dins in 4X4

eud' grosse cylindrée et y s'rinché eul' long d'eul mason. Ch' père y fait les présintations et l'aute il dit : Inchanté. Ché in malin ch'ti là, y fait pas vire ses sintimints. J'veudro savoir si vote sœur, quind à est partie, al avot des idées espéciales. Quoqu'ché qu'vous voulez dire? Bin, par eximpe, qu'al étot fort croyinte. Non, mais al avot toudis l'idée d'sauver l'monte. Et ché pour cha qu'al est partie? Cha, in n'in sait rin, a nous a rin dit. J'pourro vire eus champe? Si vous voulez, in n'y a pon touché, d'pi qu'al est partie.

Y mont à l'étache et in intrant dins l'champe, y vot bin qu'in a déringé des affaires, ché gens là y s'y racontent des carabistouilles (17) Alors, y ravisce tout partout, dins l'gard'rob, in vo qui minque gramin d'affaires. N'a in tiot lavabo dins eune salle eud'bains graine comme un mouchoir eud' poche, tout ch'nécessaire eud toilette il est parti. In vo bin qu'al avot préparé sin cop. Su l'tafe eud nuit, n'a eune paire eud'life à côté d'eul tiote lampe. Y n'in prind un, y ravisce euch'tite : L'universalité dans l'amour. Y n'in ravisce eun eut : Le bonheur et l'éclatement de soi. Y pinse qu'a n'ligeot pon n'importe quo et, qu'si al étot partie, ch'étot surmin pou aller r'joinde eun communauté quelconque. Mais aussi, ch'qui attire l'eul de ch'l'inspeceur, eune carte postale eud Suisse. Ch'l'inspecteur, y l'artourne pour vire chou qui n'a d'écrit drière et y vo qu'ché eune copine qui li dit in gros qu'ché biau eul Suisse et qu'al devrot aller y faire in tour. In li même y pins euq' ch'a srot bin là qu'al sro partie. Y print sin carnet et y note eul nom d'eul file a tout hazard.

In r'déquindant, y d'minde à ché garchons : Ech' que vote sœur, as droguot? Alors là, y s'ravissent tous les tros et y s'demindent qui ché qui va réponce eul premier. Al allo core à l'école, et in l'a jamais vu s'droguer. D'ailleurs, chétot eune bonne élèfe et al rintrot toudis à l'heure. L'Diminche, al sortot pon pour elle faire ses dvoirs. Al avot pon d'copain? Chétot juste eune tiote amourette qui dit l'un des

garchons. In l'avot averti qu'il étot pas de s'n'ache et qui fallo qu'al arrête eud li parler. Mais j'y pinse ach't'eur, in l'a jamais r'vu li non pu. Peut- éte qu'il a parti aveuc. Ses parints, y z'ont bin caché après li, mais comme il étot majeur y n'ont pon pu obtenir eud rinseignemints Si ché cha, cha sro in détournemint d'mineure. Ch'l'inspecteur, y vo bin qu'y n'in sara pon d'pus aujourd'hui, il arête eul'conversation. In s'in r'n'allant, y s'artourne et y dit : Eche que j' pourro importer l' lette? Bin sûr, y peuvent té pon dire non et n'a in garchon qui va d'in l'pièche à côté, il eufe in tiroir et y rapporte eul lette qu'y donne à ch'inspecteur in li digeant qu'y voudrot bin l'récupérer comme souvnir.

Quind il y parle d'eul carte eud Suisse, ch'commissaire y dit : Là, ché pu l'même cosse, ché in pays étringer, va falloir d'minder des autorisations. Pourqo, vous creuyiez que j'va r'partir là là? Y'a des chances. Ché suisses, y parltent frinçais ? Pon tous, mais si al a été là va, ché surmint dins partie là.

Ch'commissaire, y s'débroulle aveuc eus hiérarchie pour obtenir eul drot d'aller enquêter in Suisse, mais ché long d'obtenir l'autorisation. Ché suisses, y sont pas gramin cauts qu'in voche fouiner dins leu pays et in dit qu'y sont pon rapites non pu. L'timps passe et in' n'est toudis au même point. Pindint ch'tinps là, ch'commissaire, il invoye ch'l'invloppé à analyser, dès fos qu'in trouvرو in indice. Cor huit jours qui s'passtent. Pi, ch'labo y d'minde si in a pon in aute exemplaire de ch'écriture d'eul'fille. D'après eusse, l'écriture d'eule lette al est déjà pon pareile à chelle de ch'l'invloppé. Ch'inspecteur, il artourne vire euch père. Ch'père, in arrivant il y d'minde si il a trouvé qu'eud'cosse. Pon incore, mais j'voudro armonter dins s'chamb. Alors là, y cache dins z'in tiot bureau et y treufe des cahiers d'école. Y n'in print un et y s'in r'va aveuc. Cha s'in r'va au labo et y faut core atteinte. Quind ché résultats y z'arviennetent, y

s'apprénntent que ni l'lette ni ch'invloppe al z'ont été écrîtes par eul file. Ché l'noir absolu pou ch'inspecteur ! Au soir, dins s'champe, y peut pon dormir. Cha l'travale tellemin qui s'arlièfe et qui s'met à récapituler in tiot peu l'affaire.

1, In treufe uin cadafe eud' jaune fille din in bo. In vo qui z'on été à plusieur pou l'déposer là.

2, l'jaune file al est morte d'overdose et al a pon été violée.

3, l'photo d'euch cadafe al permet d'artrouver s'famile.

4, l'famile al avot r'chue ine letée qu'al confie à ch'l'inspecteur.

5, Ch'labo il affirme qu'eul lette a l'a pon été écrite par l'file ni ch'invloppe non pu. Mais que ch'l'invloppe al a pon été écrite non pu par eul même personne qu'eul' lete.

6, Comme eul lete al avot été postée à Grenope, ch'inspecteur il a été vire là và et d'ins l'région, mais il a pon rin trouvé. Il a quind même appris qu'ché surmin ché deux frères d'eul file qui sont allés avint li cacher après leur soeur.

Il a biau r'tourner tout cha d'in s'tière, y n'vo pon d'solution et y s'deminde, euc' si sin commissaire il l'invoye in Suisse, quo qu'ché qui pourra bin trouver la và. Pi y r'pinse d'in seul cop qu'in avot trouvé in morciau d'tissu accroché dins chés ronches à ch'bo Erness. Quo qu'ché qui n'in est de ch'morcaiu là? Faudra qui n'in parle eud d'main à sin chef. Sin chef y dit : Ché vrai ! Quo qu'ché qu'y n'in est d'venu de ch'morcaiu là? J'va r'téléphoner à ch'labo pour savoir quo. Au labo, in y dit qui vont ravisier et qu'y rapeleront. Ché cor eune paire eud'jours qui pastent et ch'labo y finit par rapler in digeant que ch'morciaux d'tissus, il étôt resté collé din sin sa d' plastique sul' côté

d'euch tirroir et qu'il l'avottent pon vu, mais qu'ach't'heur, y z'allottent eul l'analyser. Ch' commissaire, in colère, y leur répond qu'cha voche vite, pach' que ché li qui prind les engueulades et que sinon, y va faire in rapport. Deux jours après, chés résultats sont arvenus. Ché in morciau d'tissus, putôt d'eul toile qui viendrot sûremin d'eune blousse blanque, ou d'qu'eut cosse comme cha. In tous cas, il a déjà été lavé aveuc in produit industriel anti- bactéries. In vo mal qui ché qui pourro éte habillé comme cha.

Ch 'l' inspecteur y n'vet qu'in imbulincier qui pourro avoir ine tenue comme cha. Y d'minde ach' commissaire eud téléphoner à l'compagnie d'imbulance, et in effet, n'a in imbulincier qu'il a accroché s'blousse in passint. Eusse feume, al l'a même rouspétré in y digeant qu'y faigeot jamais attintion à ses affaires. In parlant d'affaires, cha n'arrinche pon du tout chelle d'ché policiers. Y in sont incore toudis au même point.

Pi, ch'médcin légiste, il a fini sin boulot et y rinvoye euch' corps a l'famile. Eul' jour eud l'interremint, ch'inspecteur il y va. Bin sûr. Pour in tiot vilache, y n'a in monde considérape. In pus eud ché gins du villache, y a toute eune bainne eud journalists et pi des caméras. N'avo même eune binde eud feume qui voulottent rintrer d'in ch'cimtière aveuc des binderoles, mais chés gindarmes y les z'ont rpoussées. Ch'inspecteur, y reste in tiot peu in arrière pour pon qu'chés journalistes ils voytent et y ravisse eul réaction d'eul famile, mais y a qu'eul douleur qui s'lit dins leurs yux. Ch'curé y fait eun dernière prière et ché gens qui connottent eul famile, y viennentent leur présinter leurs condoléinces. Pou ch'l'inspecteur, cha li apporte pon grain cosse.

Y fait in solel magnifique d'in l'arrièr pays Niçois. Dins eune grinnne bâtisse a motiée démolie, n'a eune digeaine eud jaunes gins et d'jaunes files qui s'appliquent ent'à raccomoder ch'batimint. Y z'ont d'mindé ach' propriétaire, (Ché in viux qui reste ach't'heur dins in appartemint à Nice), si y pouvottent eul l'artaper et, comme il est riche, qu'y a pon d'infants et qui n'a pon b'son s'sous, y leur a dit eud faire chou qui voulottent.

Y n'n'a qui font du béton, d'zeutes qui machonnetent, d'zeutes qui font d'eul meunuiseerie, y n'a qui sont in heut eud'd'z'équelles. Infin, tout l'monte y travaile. Dins ch'parc autour, y n'na qui gardinntent. Ché tous des jaunes qui z'ont décidé eud vive autremin. Ché un homme, in grind, aveuc des longs ch'veux et eune barpe eud capucin, aveuc in bandeau autour d'sin front, qui a comminché à li tout seu et aveuc internet il a raconté s'histoire et cha n'a pas minqué d'y ramner des disciples et tous chés jaunes là, y vivtent pour ainsi dire in autarcie. Y vivtent inseinne, y mingtent inseinne, mais y couqu'tent pon einseine, a part cheux qui y ont trouvé l'amour. (Cha arrife quind in est jaune) cha fait qu'y n'ont pour ainsi dire pon d'rapport aveuc personne d'aut. Dès fos, n'a in viux voisin qui leur dit bonjour quind il est dins sin gardin. Et eune fos, il avot d'trop d'haricots verts et il leur a demindé si z'in voulottent. Ché jaunes y s'y on dit qu'ouais, qu'cheux qu'y z'avottent plintés, y étotent pont cor assez gros pour les ceuiller. Vous n'avez qu'à aller ach'portal, j'va vous in porter. Queuques temps après, l'viux y vint z'apporter dins z'in journal. Eusse, (qui printent pon l'journal), y z'y digitent merci et y rapportent ch'paquet à l'cuisine. Y z'étais chez z'haricots su l'tafe et, in ouvrant l'feule, qu'est-che qui vottent : L'photo d'eul fille

qu'al est morte. Tout d'suite, ils l'arconottent pache qu'al étot aveuc eusse y a pon longtainps. Y vont tout d'suite eul dire à ch'ti qui fait office eud directeur eud chantier, qui, ly, print sin vélo, pache qu'y z'ont pon l'téléphone, et va avertir chés gindarmes. L'nouvelle al parvient bin vite à ch'l'inspecteur et sin commissaire, qui y dit d'y aller au pu vite. Vla déjà des mos qu'cha dure euch't'affaire là, vla quind-même queut'cosse eud nouviaux.

In même timps, ch'commissaire y dit a chés gindarmes eud l'a vâ d'inquéter in tiot peu tout autour, mais sins rin faire vire, surtout, n'pon aller vire ché gins là.

Ch'inspecteur y dit ach'commissaire qu'il aurot pu quère y aller aveuc eus n'auto pache que cha s'troufe dins la nature et qui sra imbété pou s'déplacher. Ch'commissaire y il donne eus n'accord.

Li qui est habitué a vire in pays plat, d'u qu'y pleut d'tinps in timps, qu'chés patûres al sont tout vertes et chés vaques rontes comme des timburs, il arrife dins des tiotes routes qui monttent pi qui déquintes sins arrêt. N'a pon d'peuplier comme dins ch'nord, mais des arpes rabougris dins eune végétation tout sèque. Na même des indrots euq'tout a brûlé. Eul long d'eul' route, n'a tout des tiots qu'mins et à chaque tiot qu'min, n'a des gindarmes ou bin des pompiers qu'y les barrent. Chés promneurs, y z'ont même pu l'drot d'y passer.

Il arrife dins in tiot vilache, y n'n'a jamais vu d'si biaux. In dirot eune carte postale. L'long d'ché rues étrotes et toutes tortues, des belles tiotes mason couvertes eud fleurs qui déquintes tout du long d'leurs façades. In vot bin qu'al z'ont pon été démolies pindint la guerre. Cha sint vraimint bon. Li qui va toudis in vacances dins l'baie d'somme, il est in tiot peu dépaysé. Y s'dit aussi qu'ché biaux, mais qu'il y fait trop caud. Il a pu quère Saint Valéry. Malgrès qu'ché pon graind, y a

tout d'meume eune gindarmerie et ché là qui va tout d'suite. Chés gindarmes y s'y digent que ch'batimint dont y parle, y s'treufe in tiot peu pu heut dins l'colline. Euq'si y veut, y peufttent eul'l'accompagner, mais li, il a pu quère aller vire tout seu. Y z'y digent aussi qu'y z'ont bin inquéte autour in s'rinceignant mon d'chés gens d'alintour, mais qui z'ont rin appris. D'lon, aveuc leurs jumelles, y z'ont vu des jaunes qui travillottent in quintant pi ché tout.

In arrivint devint ch'portal, ch'inspecteur y cache euch'bouton d'sonnette, mais y n'a pon. Il apperchu queuc'qu'un dins ch'gardin et il y crie qu'y veut rintrer. L'aute y l'y répond qu'il a qu'a pousser l'porte, euq ch'é pon freumé. L'vla tout étonné, y s'atteindot a eune secte et y pinsot pon qu'cha allot éte si facile euq cha d'rintrer.

Y d'minde à vire euch directeur, et ch'jaune homme il conduit tout près de ch'batimint in réparation. Ch'directeur, Ché comme cha qu'in peut l'l'appler, quo qu'y dit qu'il est pon supérieur à z'eutes et qu'y sont tous égaux, il est in train d'faire du béton. Quint y moute eus' carte eud police, ch'directeu il y dit : J'veus attindot, y s'essuie ses mais à sin patalon et y l'y tint sin peugnet in li digeant qu'il a ses mains sales. Pis, il y dit: Deux minutes, j'va les laver in cop et j'va vous ar'chuvoir. Ch'directeur, Il'l' fait rintrer dins eune pièche qu'in peut apler bureau pache qu'y n'a des papiers pis des lifes tout partout. Mais ché l'verai capharnaum . Ché pon trop prop non pu, y a gramin d'poussière Alors il y raconte, qu'in effet, eul file al a bin restée là aveuc eusse. Al étôt courageusse comme tout et agréape à vivre aveuc eus z'eutes. Pi, in jour al a disparue et in n'a pu intindu parler d'elle, jusqu'à temps qu'chés cuisiniers, y z'ont vu l'photo su l' journal.

Pis vous n'avez pon caché après ni signalé s'disparition? Vous savez ichi, ché po eune prijon. Ch'ti qui vient, y n'a personne qu'il la

obligé et y peut s'in r'n'aller quint'y veux. N'a personne qu'il a jamais v'nu l'veire? Si, eune fos, deux jaunes hommes y sont vnuus mais al voulo pon les vire. Y sont rpartis, mais huit jours après, y z'êtotes arvenus. J'les ai pon r'vus personnellemint, mais ché chou qu'in m'a dit. Ché après qu'in n'a pu r'vu l'file, sûrmint qu'ché eux qu'ils l'ont imbarqué. Mais cha m'étonne qu'al auro pon crié. Vous avez vu leur auto? J'lai aperchu, sin gramin faire attintion, mais ch'êtot in 4X4. Ch'inspecteur is dit qu'ché forchémint chés deux frères qui sont v'nus r'queur leur sœur, mais y vot pon pour quo qu'ils l'arottent tuée. Y r'mercie ch'directeur eud ses rinseignemints et y rprind la route et s'in rturne a sin commissariat faire sin rapport. A eusse deux, y réfléchistent et y s'digent qu'cha n' peut éte euq'ché deux frères qui z'ont ramnés leur sœur. Mais ché pont ch'4X4 qui a rintré dins ch'quemin, y srot pon resté in raque. Ch'commissaire, y décide d'aller aveuc eus' n'inspecteur vire à ch'"catiau". In arrivint, n'a pon d'auto dins l'cour, suremint qu'chés garchons y sont au traval. Ché l'servante qu'a les r'chu. Monsiu, il est couqué, il a in limbago, cha l'y arrife eud tinps in temps et y n'a bin cor pour eune sémaine. Chés policiers, y z'y digentent qu'al avertiche chés garchons, et qu'y r'vindront après 6 heures. Y s'in r'vent et in route, y pinsent euc'si y z'ont ramné leur sœur, y a surmint des traces eud restées dins ch'4X4. In rintrant, ch'commissaire, y téléphone ach'service sciintifique qu'il a b'son d'eusse et qui vincentent tout d'suite. Ch'4X4, il a été nétié complêt'mint n'a pon longtimps et in n'y treufe rin. Rin d'pus dins ch'l'auto noirte, pourtant al a pont été nétiée eud'pis in bon moment. Ch'l'inspecteur y caresse eus barpe in réfléchissant. Y ravisse les invirons sins rin fixer d'particulier, et à 10 mètes d'uel mason, y vo in batiment tout in longueur aveuc des tiotes fernettes in forme eud'demi-lune. Y d'minde à in garchon qu'oc ché qu'cha et il y répond euq ché des inciennes écuries. Et n'a rin d'din? Et ch'garchon il y répond qu'ché l'auto de ch'père qu'al

est d'dins. Ah!, vot père il a aussi eune auto. J'pourro l'vere?. J'va aller queure eul clé d'euch garache. Ché eune auto breack bleu marine et l'homme eud sciaince y vo qu'in a passé in cop d'aspirateur n'a pon lontain, mais in cachant bin, y treufe in qu'c'veu blond dins ch'coffe. Y dit qu'in va l'faire analyser et qu'avec euch'l'adn, in ara bintôt r'trouvé a qui qu'il appartient.

Alors, euch' viu, qui soit digeant pouvot pon s' bouger, y déquin dins l'cour in brayant et y dit : Ché pon l'peine, euch' va tout vous raconter.

Tout est de m'feute. Ché mi l'responsape. Mes garchons, y avottent fait leur deul eud leur sœur, mais mi, je n'y arrivot pon et j'l'ai ai toudis imbété aveuc cha. Pour mi, m'file, chétot mes deux yux. A r'seinot (18) tellemmin à s'mère qu'j'avo perdu d'bonne heure. Alors y ont continué à cacher, et in jour, y z'ont vu in r'portache a l'télé su l'tiote communauté. Y z'ont pinsé d'aller vire là là. Quind y z'ont r'trouvé leur sœur, al a pon voulu r'venir. Y m'ont téléphonné pour m'eul dire et mi, j'leur ai dit qu'y fallot absolumin qu'a r'venne. Alors y sont déquindus à Nice et y z'ont caché (19) a s'procurer d'eul drogue pour indormir leur sœur pour pouvoir eul ram'ner. Y z'ont triné dins ché bars tout les nuits et y z'ont fini par tomber sur in type qui leur vindu in produit et qu'il leur a dit qu'aveuc cha, al allo dormir tout l'long d'eul route. Cha leur a coûté quer, mais y avottent chou qu'y voulottent. In r'tournin vire leur sœur, y z'y ont proposé qu'a leur fache visiter ch'villache et il l'on imbarqué. Al s'a assis d'vint et ch'ti qui étôt driére, il l'a piqué aveuc eul serinque qu'l'aute drogué y avot donné. Comme y n'y connaicho rin, il a piqué in tiot peu au hazard. M'fille al s'a indormie tout d'suite et y z'ont r'pris l'quemin du r'tour. Y z'ont roulé tout l'nuit et quind y sont arrivés ichi, al dormot incore. Y z'ont essayé d'eul réveiller, mais y s'sont aperchu qu'al étot morte. In n'savo pu quo faire. Alors ché mi qu'il a

eu l'idée de l'mette dins ch'bos Erness. J'eul conno pache que ché à mi, je l'avot hérité mais il étot déjà dins ch'état là. Alors euj m'in suis jamais occupé. J'savo qu'y n'a jamais personne qu'il y rinte et d'ichi qu'in ar'troufe eum file, y s'pass'ro pon mal eud temps. In a pris m'auto pache que ché in break et in l'la allongée d'dins. La là, ché garchons, ils l'ont saqué dins c'bo, J'ai brai tout l'long d'eur route, mais n'avot pon d'autre solution. J;bréyo tellemin que véyo pu la route et qu'in r'partint, in a failli rester in raque et ché garchons y z'ont du pousser. Si al avot pon perdu s'quechure, n'a jamais personne qui l'aurot r'trouvé Voilà, vous savez tout.

Chés flics, in r'partint pour aller avertir euch' parquet y digent qu'infin, ch'affaire al est résolue.

Y roultent in bon momint sins rin dire in buzillant, pi, ch'inspecteur, y soupire in bon ceup et y dit :

Pauf viu !

Lexique

- | | |
|-----------------------|-----------------|
| 1, Morceau | 16, Dérangeant |
| 2, Tombés | 17, Histoires |
| 3, Songe en rêvassant | 18, Ressemblait |
| 4, Dés'embourber | 19, Cherché |
| 5, Beaucoup | |
| 6, Chaussure | |
| 7, Avance | |
| 8, Montrerai | |
| 9, Pleurer | |
| 10, Reconnaîtraient | |
| 11, Frayé | |
| 12, Beaucoup | |
| 13, Regarde | |
| 14, M'emmène | |
| 15, Grand | |